

1 Tésáróníka

Ísu wíyómpa'a iyówana Póro moórá-waai-aataiya'iyó miyáumai-aatai maisuwéna maanááimá agaimái Tésáróníkaa-naoraa-waasifa'a agaimái mátímakaiye. Póro ásé-aai kosimátimuwasa isésa érai'e sésa Ísumpa'a timankúnkúmba uráawe. Mináái Aantá-waasi-taai-aufaifimba 17:1-9-fimba wéraiye.

Ísun-aai Póro fí'o-fi'on-daopa'a kosimátimena Kórinti-naopa'a koméronka'a Tímóti Tésáróníkaa-naopaken-kwaasi-taai kosimátimena wéaisai-un-aaima kosimámuwana anondáá-aai agaimái timúwasa mátímakaawe.

¹ Kemá Póro maanáái maanáúfáífimbá agai-timúmpo isáaro. Moóráwigon-awi'a Sáírásiye moóráwigon-awi'a Tímótiye kesé'o méraayanka'a moórá-aai sénaumpo isáaro. Tésáróníkaa-naopakewi Maníkóní waási isáaro. Maníkó kentáásifowae'o kááísamaimo mé'o Fasi'aénkó Ísu Káráísitiye'o kááísamaimo méraawi isáaro. Maníkó úwoi wétuwa'nai-ena faru wéuwatinkaintafe'a inái sune.

*Tésáróníkaafaken-kwaasi Maníkómpá'á
timankúnkúmba uráan-aai.*

² Inaimó súndarataamo únda kembiwísáféta imáyáama éta Maníkómpá'á aasiyaasí súwiyosa wésune. ³ Ísun-aaisafe'a timankúnkúmba é'a pó'a wení kisauma kawé'-úmai wémaewe. Maníkómbá tirumbó wéametafe'a pó'a kawé-kísáúmá fasi'ámai wémaewe. Kentáásí Fasi'aénkó

Ísu Káráisiti érai'a kumíniye sentáfé'a pó'a fasi'ámai mé'a wéamu'maraawe. Miyaráán-úmai méraantafeta imáyáama éta Maníkó kentáásifowampa'a súwiyosa sune. ⁴ Maníkó arumbá tiména wení waási-i'o uwátínkaraimba éta tuwánaraumne. ⁵ Ímba kentáási imáyáafinkemba úwoi-aaisa kosimátimewandanifo Maníkóní Ufaen-ámútánkó keséta mérowata Maníkóní fasi'aénkwará'á áse-aai kosimátimeta áse-aaisafeta simankúnkúmba fasi'ámai uráundasa minásé-áái kosimátimewanata ísaraawe. Ísowata séta Maníkóní waásin-owesa siyáumne. Kesétaamo maéwándarata wétuwa'nai-eta méraawana'a suwánaraawe. ⁶ Fasi'aénkómó úntenkwaru kesáámó ówándantenkwaru'a miyá uráawe. Miyámó umbá umbái tiyómbanifo ímba ifátuwanæ sumbá simátimakon-aaima méta'otokaawe. Maníkóní Ufaen-ámútánkó imáyáama timúwa'a tirumbá kawé'-úmai mé'a áse-aai méta'otokaawe. ⁷ Miyáumai mérowasa pósa Maníkón-aaisafesamo timankúnkúmba on-kwáásímá Máséndóniyaafakene Ákáyaafakene miyáumai-naoken-kwaasi kembá tuwánésa kemó untembá miwí uráawe. ⁸ Fasi'aénkón-aai kentópakemba simátíma'maesa kuráawe. Ímba Máséndóniyaa-waasiwara Ákáyaa-waasiwara aantembanifo seyaafá'-áémpákén-kwáásiwará'á ísaraawe. Maníkón-aaisafe'o timankúnkúmba on-áái seyaafá'-áémpákén-kwáási ísaraawe. Maníkompá'ó kááisamai méraan-aai é'a ísáamba póta ímba anekata simátimenaumne. ⁹ Kempátáámó komaéwándara'a kawetáámó uwásínkarontafesawe sésa kawé'-áái wésewe. Waántá-waasiti aambá tuwésa Maníkompá'á

tiyóntafesawe sésa kawel'-áái wésewe. Maníkó fasi'aénkwáráwí érai-Fasi'aenko wení kísau wémaentafesawe sésa kawel'-áái wésewe.
¹⁰ Aneka'á wiyómpakemba Maníkón-ááninko Ísu kumíniye sé'a wéamu'maraantafesawe sésa kawel'-áái wésewe. Maníkó Ísumba pukómpinkemba iyáfasinankowana sáwí-imayaagomo ta'ótokaimpinkemba faúsinkenasa kawepátá mósinkena séna Maníkó aafimbó maitinkáíndara'a faútinkaundawi ímba maitinkáíníyemo siyáiwaimba amu'maráantafesawe sésa kawel'-áái wésewe.

2

Tésárónikaafa'a Póro kisaumo maiyáin-ai.

¹ Kentáási waásisono. Kesé'o komaéwándarata áúwara-kisaumo maéwándasa éta suwánaraawe.

² Ímbo kentópa'o kówánda-kanaafinta Fírípáinaopa'a komaéwánasasa suwánésa sínkamesasa sáwítaamo uwásínkón-ai é'a ísaraawe. Maníkó wení fasi'aémbá símakowanasa póna ímba sáá'a úwata ímba tiyawembá ówándasa Tésárónikaafata kentáa Maníkóní ásé-aaisa kosimátimakaumne. Sáwí'o uwásínkówisa umbaisá siyómbanifo ímba tuwááwándasa

³ ímba karo'-ímáyááfínkémbá simátimeta ímba aare-úmén-ímáyááfínkémbá simátimeta ímba waé'wáé-ááífínkémbá simátimewandasaanifo

⁴ Maníkó kentáásáféna séna kesi waási ontáfé'a ásé-ai kosimátíma'mae'a koró súwata simásímakain-ai kosimátíma'maeta kuráumne. Maníkó wen-ísarena kesiruntá tuwináinda póta kísau wémaeta séta waásimo suwánésasaamo ésa tuwímbai aamoí iyasa tuwímbai ímba aamoí

íyamba póna Maníkó suwánénasa aamoí íníye-
imayaa éta kísau wémaeta ⁵ kentópa'a ásé-
aai kosimátimeta ímba tirunkáámbá kofaiyá'mai-
aaifinkemba kosimátimewandasa ísaraawe. Ímba
símai

fi'owani moparáwintáféta súraniyamba wéeta
kosimátimewandasa Maníkó suwánaraiye. ⁶ Ímba
símaimo kembiwíwára fi'on-kwaasiwara'a
kesúwita óraa'a ónae-imayaan-^{ofo} séta
kosimátimakaumne. Kesé'o maéwándarata Ísu
Karáísiti si'marón-kwaasisa ówándanifo ímba
óraa'-waasi-ita úmai méta ⁷ wempatá úmai
méta aaregómó wení iyámpóimo káráwiyintenta
uráumne. ⁸ Kembiwí kesiruntá tímaketa Maníkóní
ásé-aai kosimátimeta sínkamiyata puwúnafo-
imayaa ínta ówándasa Maníkóní ásé-aaisa
kosimátimakaumne.

⁹ Kentáásí waásisono. Kesé'o
maéwándarataamo fasi'aén-kísáúmó maéwánda
tááka'a makáawe. Maníkóní ásé-aaimo
simátimewandasa aafáyáara'e fenómpinka'e
nó'waane kísausa maiyáumne. Tómbá ímba
úwoi simíwae séwándasa tómbá méyánúmai
wéneta maiyáumne. ¹⁰ Kembiwí Maníkómpá'á
timankúnkúmba uráawise'a maéwándarata
kawel'-úmai arupise úmai méta ímba
sáwí'a ówándasa maéwána'a suwánontemba
Maníkówárátá suwánaraiye. ¹¹⁻¹² Tifoísáimo
kentí iyámpóimo káráwiyonten-úmai moórá-
mora kesáámá káráwiyeta méta faru uwátinketa
Maníkón-aai kawel'-ááímá wésimatimeta séta
miyaráámbá íyantafe'a Maníkómbá aráái wáiyana
Maníkó aamoí íníyesa siyáumne. Maníkó wésimba

pó'a wemó kawáánipa'o wení sámó kaipa'á
táméranaawe. Miyámó íyantafe'a Maníkómbá
aráái wáíyana wemá aamoí íníye.

13 Maarán-ááíwárátá Maníkómpá'á aasiyaasí
súwisa súne. Maníkón-aai simátimewandarata
kembíwí sé'a waási-taain-íye ímba sumbá
Maníkón-aain-íye sé'a tirumpimbá fasi'ámai
méta'otokaawe. Simátímakaunda-aai érai'a
Maníkón-aain-íye. Simátímakaunda-aaisafeta
timankúnkúmba ombá póna minááígó
wétuwa'nai-íye. Mindásafeta íséta Maníkómpá'á
aasiyaasí súwiýosa súne.

14 Kentáásí waásisono. Yúndaa-aempaken-
kwaasi Fasi'aénkóní waási Ísu Káráisitiye'o
kááísamaimo méraan-kwaasifa'o paápé
uráintemba kembíwíwárá'á miyá uráíye.
Yúndaa-aempaken-kwaasimo miwífinkémbá
Ísu Káráisitin-aaisafesa timankúnkúmba
wéompinkemba sáwí'o uwátínkaraantemba
kentí waási kembá sáwí'a uwátínkaraawe.
15 MinYúndáá-wáásí tíwá'náma naaófá'á
Maníkón-aai simátímakowi tínkanto'naamai
úmae wéiyuwasá putásowasa maimaé wéiyesa
matínkámae íyówasá miwí tísaafitántamba
ésa káfé'o méraawi Fasi'aénkómbá Ísumba
tufúwana puwúwasá kentáámá sáwí'a
uwásinkesa arááíwakaawe. Miyámó untáféna
Maníkó ímba aamoí uwátínkaraíye. Miwí
seyaafá'-wáásítí namuro-wáásíyáámbán-
owe. 16 Maníkó sáwí-ampakemba kawé'-
ámpá'ó métinkaindasafeta fí'onkaa-waasisafeta

Maníkón-aaí simátíma'maeta wégundasa Yúndaa-waasi aambá fáisinkesasa seyaafá'-wáásítí namuro-wáásiyáámbá wéowe. Tiwá'náti sáwí-kisauwara'a káfé'o méraan-kwaasi maimaé wéiyowana káfé'a Maníkó aaisambá wétiyiye.

Póro aneka'á kotuwánánaemo siyáin-aaí.

¹⁷ Kentáásí waásisono. Kembá tiyuwéta maanká'á ampáánká'á taméta kembiwísáféta imáyáa áfááraumai wéeta kembó kotuwánaanda-antafeta wésaafa-eta ¹⁸ aneka'á kotuwánánae séta kemá Póro sé'a aneka'á kotuwánánae símasima'a wéunana waántáwanko aambá fáisinkaraiye. ¹⁹ Ánaaemba Fasi'aénkó Ísumo kumínda aúranka'a kométa nóintafetaawa amu'maránaum nóintafetaawa aamoisá ónaumno. Kembiwísáféta imáyáa éta aamoisá ona'á ²⁰ kentáa sáwí'a mósá maráiyana sirunkósá aamoí íniye.

3

¹ Kentáfékai óraa'-imayaa wéekainifo maankákái maékai kembiwí fi'opa'o méraantafekai Áténisi-naopa'a kerái maékai ² Tímótimba ai'marááwáyana kentópa'a kuráiyé. Tímóti kentáásí kawé'-wáási póna wesé keséta Maníkóní kisausa wémaunanasa póna Ísu Káráisitini ásé-aaí simátíma'maena wéwiye. Koáfomba faiyáína'a Maníkómpá'á timankúnkúmba fasi'ámai íwae sé'a Tímótimba ai'marááwánana kuráiyé. ³ Maníkón-aaí ímbo ísááwi sáwí'a uwátinkaiya'a Maníkómbá aúwáafo sé'a Tímótimba ai'marááwánana kuráiyé. Maníkó séna kesááimo ímbo ísááwi sáwí'a uwátinkanaawe

siyáimba pósa kentáá sáwí'o wéuwasinkaamba é'a ísaraawe. ⁴ Kesé'o maéwándarata séta sáwí'a uwásinkanaawemo siyáundasa káfé'a mápaape-isa'a wéawanaawe. ⁵ Kemá imáyáa é'a waántáwanko séna Maníkómbá auwésa kesáái isáiwae sintáfé'a miyá uráawe. Maníkómpá'a timankúnkúmba wéoo sé'a kentáái isánae sé'a Tímótimba ai'marááwánana kentópa'a kuráye. Kentópa'a kisaumo komaéwánda áúwara-kisauma maiyáunda káfé'a minkísáúgón-áúma áwiyo'wifo sé'a Tímótimba ai'marááwánana kuráye.

⁶ Tímóti kentópa'a koména kouweréna kesópata téna kembiwísáféna séna Maníkómpá'a tirumbá timésa wenká'a timankúnkúmba fasi'ámai owé séna ásé-aaisa tasimásímakaiye. Kembiwí kentáfé'o sé'o kawé'-áái siyémo senkwará'a tasimásímakaiye. Kesáámó sétaamo kembiwí kotuwánánaemo súna'o kentáásáfé'o tatuwánanaemo senkwárátá tasimásímakaiye. ⁷ Maníkón-aai simátimundarakemba tuwímbai sáwíta uwásínkáánka'a Maníkón-aaisafesa timankúnkúmba fasi'ámai on-áái tasimásímakaimba póna áfombo faiyáin-aai tasimásímakaiye. ⁸ Fasi'aénkómpá'ó kááísamaimo fasi'ámaimo méraan-aai iséta póta kawetá úmai méraumne. ⁹ Maníkómpá'a fasi'ámai méraawata póta Maníkónópata kentáásirunko kawé'a wéisata Maníkómpátá súwi sune. ¹⁰ Kentópataamo konda-ámbá Maníkó wi'maráíndasafeta fénáímpinka'e aafáyáara'e Maníkómpátá fasi'ámai áísai úmae wéiyune. Maníkón-aaisafe'a timankúnkúmba ombánifo moóráfa'a wétuwaantafeta kotúwa'nai ónae séta

Maníkómpá'á fasi'ámaisa sune.

¹¹ Inaí súndasa pósarai Maníkó kentáásifowae Ísu kentáási Fasi'aénkóe úmai kentópataamo konda-ámbá wisinkáyááye. ¹² Inaí súndasa póna kesiruntá áfááraumai tímakaundanten-úmai Fasi'aénkómá imáyáa timína'a moórá-mora kentirumbá timé'a seyaafá'-wáási kentirumbá timé'a ménaawe. ¹³ Miyá iyana Maníkó kentirunkómbá fasi'átinkaina'a Ísu kentáási Fasi'aénkómó wení waásise'o kumíndara'a Maníkó kentáásifowan-aúranka'a kawel'-úmai méraiyaana sáwí-aaí kempímbá ímba wéraindasafeta inaí sune.

4

Miyásáámó wéunanasaamo Maníkómó aamoisáámó wéuwasinkain-aaí.

¹ Kentáási waásisono. Moórá-aaíwara'a ísáaro. Fasi'aénkó Ísuwe'o kááísamaimo méraundasafeta wa'wiséta óraaka'a simátimeta séta Maníkómbó arááímo taiwáíní áwáumo aráátimundasa arááiwa'mae'a wéwiyana Maníkó tuwánéna aamoí uwátinkainiye. Minááígóní áwáuma é'a wéaraaiwaefo miyáumai arááiwa'mae'a koró. ² Fasi'aénkó Ísu simásímakain-amaanta simátimewanda é'a isé'a wéaraaiwaewe. ³ Maníkó maarámó iyantafena aráái wétaiye. Kembíwí Maníkómpá'á té'a wendé-í'a taúráaro. Aare-úméné inaamaru-úméné aséráaro. ⁴ Waaímó é'a aaremó maíyamba arupíse úmai máéro. Miyámó iyamba Maníkó miyámó iyantafena aráái wétaiye. ⁵ Maníkómpá'ó ímbo tiyáan-kwaasimo ontembá ímba miyán-oro. Póí-iyankomo

waafán-ínímbó máentemba ímba miyán-oro.
⁶ Maníkóní áamámba miyáumai wérantafe'a
 aaremó maíyamba kentí waási ímba sáwí'a
 uwátínkáaro. Ááema óraaka'a simátimeta sêta
 miyá-sáwí-ámpá'ó wíyanamo éna Maníkó umbai-
 méyámbá timíníye. ⁷ Maníkómó wení waási-i'o
 uwásínkáinta kawé'ó úmáimo méraandasafenasa
 wéuwasinkaiye. Ímbo sáwí'o úmáimo méraan-
 ita wéuwasinkaiye. ⁸ Mindásafesa súnda-aai
 isésa tínaaeni'o uwátimiyawima ímba waási
 aantemba tínaaeni'a uwátimenaafó Maníkó wení
 Ufaen-ámútámbó tímiwainkwara'a tínaaeni'a
 uwámenaawe.

⁹ Kembiwí kentí waási Maníkón-aaisafe'a
 timankúnkúmbo on-kwáásí moórá-mora ken-
 tirumbó tímén-aai Maníkó aráátimakaimba pó'a
 é'a miyá wéofó moórá-mora kentirumbó tímén-
 aai maankwándááífímbá ímba agaénaumne.
¹⁰ Kembiwí Máséndóniyaa-aempaken-kwaasi
 Maníkóní waási é'a kentirumbá tímakaawe.
 Óraaka'a sêta moórá-mora kentirumbá
 tíma'mae'a iyóro sumpo ¹¹ fasi'ámai imáyáa
 wée'a faru úmai mé'a kentúra'a káráwiye'a
 tómbó maíyantafe'a kísau máéro. Minááímá
 éta simátímakaunda ¹² miyá é'a kísau maíya'a
 Maníkómpá'ó ímbo tiyáan-kwaasi tuwánésa
 kembiwísáfésa kawé'-wáásí owémá sénááwe.

Miyá é'a kísau maíyana ímba táái táíníye.

Fasi'aénkómó kumínda-aai.

¹³ Kentáásí waásisono. Maníkón-aaisafesamo
 timankúnkúmbo un-kwáásímó púwówasamo
 utámakaan-kwaasisafe'a tirunkó sáwí'an-ifo sêta

érai'-aaimo simátíménda ísáaro. Maníkómpá'ó ímbo kááísamaimo mésamo Ísu kumíndara'lo pukáampinkembo íyáfasinaiyantafesamo ímbo amu'maráan-kwaasi tirunkó sáwí'a wéifo kembiwí miyán-ofo séta senda-ááísá ísáaro.

¹⁴ Ísu pukáimpinkemba íyáfasinkaintafeta érai'esa sumpo Ísun-aaisafesamo timankúnkúmbo ésamo pukáan-kwaasi Manikó miwíwará Ísunkwara'lo tiyáínda-aaisafeta érai'esa sune.

¹⁵ Simátíménda-aaima Fasi'aénkómá siyáin-aain-ye. Fasi'aénkómó kumíndara'a úwoimo túmó aráan-kwaasi pukéwi aifa'á ímbo iyáákanaawe.

¹⁶ Manikóní kísau-waasigo wiyómpakewi aaí sínana Manikóní uwíyenko óraaka'a aaí sínana Fasi'aénkó óraaka'a wésindafinkemba wiyómpakembo kumínda Ísu Káráisitín-aaisafesamo timankúnkúmbo ésamo pukáan-kwaasi aifa'á íyáfasinaiyata ¹⁷ Ísu Káráisitín-aaisafeta simankúnkúmbo étaamo úwoimo súmó aráandawisa kufarámbainata ainámpimbá aifa'ó iyáawise'a itúwaandu éta Fasi'aénkómbá iawánéta miyáumai aasiyaasí Fasi'aénkóe'a maé'mae'a ónaumne. ¹⁸ Mindásafe'a simátisimati wée'a fasi'átinke'a méraaro.

5

Fasi'aénkó kumíndasafetaamo to'mayaa onda-áái.

¹ Kentáásí waásisono. Fasi'aénkó Ísumo kumínda-kanaa ímba ísare'a maankwándááfímbá ímba agaiyáumne. ² Kemá ísaraawe. Nó'waamba umén-kwáásímó kafífímbó tentenkáán-úmai Fasi'aénkó Ísumo éna miyáumai

kumíniye. ³ Waásimo maarámó sentembá káfé'a kawe-kánaáfímbá aáno úmai méraumne síyambanifo minúwóiyáámbó éna sáwí-kanaago téna tasáwí'a uwátinkainiye. Aaregóní kanaamó tisanamó ímbá iyámpói wéma'ankaiye. Miyámó ontembá misáwí-kánaágómó éna ímbo asétinkainda seyaafá'nánká ta'ótorainiye. ⁴ Kentáásí waásisono. Umén-kwáásígómó kenti moparáwímbó tamaimaiyáina'o awáné'o é'a táátafe'a iyambanifo ímba kumeupá'a méraamba póna Fasi'aénkó Ísumo kumínda ímba táátafe'a ónááwe. ⁵ Kembiwí sámó kaiwáín-áraátomba owatá kesááwará'a ímba kumeukóndésá úmpo sámó kaiwáíndésá úne. Ímba sáátafeta ónaumne. ⁶ Tuwímbaimo ombá Ísumo kumínda-imayaa ímbo ombá káátumo wáéntenkaamba wéofó kesáá ínta miyásá éta káráwimaisa kawe'-ímáyáásá úmaisa ménaumne. ⁷ Waási nó'waamba tún-kwáéwasa uwóí'o on-dómbó naan-kwáásí nó'waamba nésa uwóí'a ónááfo ⁸ kesáá sámó kaiwáín-áraátomba póta ímba miyáraántá ondasá kawe'-ímáyáá úmaisa ménaumne. Miyáumai méta wenókáámbó faférimaisaamo méraundantemba Maníkómpá'a simankúnkúmba éta waásisomba siruntá wétimeta méraumne. Wenótámbó súsaamo fáituwaundantemba Ísu Káráisiti kusiyáíndasafeta amu'maréta méranaumne. ⁹ Maníkó wení waási-ita uwásínkaraimba kentáásí sáwí-kisaurakemba Maníkó ímba áyánta uwásinkainifo Fasi'aénkó Ísu Káráisiti kentáásí sáwí-kisaugomo ta'ótokaimpinkemba faúsinkenasa kawepátá mósinkaindasafena Maníkó wení waási-ita uwásínkaraiye. ¹⁰ Fasi'aénkó Ísu Káráisiti kentáásáfénawe séna

pukáimba póta kumínataamo éta úwoisaamo méraunda-waasiwara pukáan-kwaasiwara'o éta weséta ménaumne. ¹¹ Mindásafe'a moórá-mora túwa'nai e'a kawel'-áái símasima'o íyamba pó'a fasi'ámai ménaawe. É'a wéomba pó'a miyá úmae iyónááwe.

¹² Kentáási waásisono. Moórá-aaimo óraaka'o simátiménda isáaro. Kempimbá kísau maésa kawel'-áái simátimesa fasi'ámai arupise uwátinkaiyantafena Fasi'aénkó miwí iyáfasintinkarain-kwaasi-taai taawiyáfóro. ¹³ Kembiwífimbá miwí kísau wémaentafela pó'a miwí táái mósá maré'a kentirumbá wétime'a méraaro. Kembiwisé'a faru úmai méraaro.

¹⁴ Kentáási waásisono. Óraaka'o súndasa kafóná-waasisafe'a óraaka sé'a arupise uwátínkáaro. Táátafesamo íyan-kwaasi tirumbá fasi'átínkáaro. Aamoisaén-kwáásiwará'á túwa'nai oro. Seyaafá'-wáási wempa'á aáno úmai méraaro. ¹⁵ Kembó sáwí'o uwátínkéwa'a anondáa miwí sáwí'a uwátínkáafo sé'a aambá fáitinkaaro. Aasiyaasi miyáumai kembiwisé úmai fí'on-kwaasiwara'a kawel'á uwátínkáaro.

¹⁶ Aasiyaasi tirunkó aamoí ina'a mé'a ¹⁷ Maníkómpá'á inai símae wéiye'a ímba saagaaró. ¹⁸ Kentópa'a fí'o-fí'on-tantaa'a kawetántáá'é umbai-tántáá'wará'ó tinda Maníkómpá'á súwi seró. Miyámó íyamba Maníkó miyámó íyantafena wéankaiye. Ísu Káráisitiye'a kááísamai mé'a Maníkómpá'á seyaafá-tántáátáfé'a súwimo wéseмба Maníkó miyámó íyantafena wéankaiye.

19 Maníkóní ámutankomba ímba aambá
fái'anke'a 20 Maníkóní ámutankomo
simátímakain-aai wésimatimiya'a mináái
ímba tínaaemba uwáméro. 21 Seyaafá-
tántáá'á tuwíntuwe'a kawé-tántááká'á fasi'ámai
méta'otoraaro. 22 Seyaafá'á fí'o-fi'o-
sawi-tantaatafe'a aséráaro.

23 Maníkó faru wéuwatinkaiwaini áwáun-
iye. Wemá kembiwí wefári'lo índasafeta inái
súne. Maníkó kentí imáyáara'e túwawaaka'e
timanka'é káráwiya'a kawé-úmai méraiyaamba
Fasi'aénkó Ísu Káráisiti kumíndara'a ímba sáwí-
aai kempímbá wéraindasafeta inaisá súne.
24 Maníkó éraikoni áwáuma póna wení waási-
i'a uwátinkaindasafena táántaraiwai wemó
siyáintemba miyá uwátinkainiye.

25 Kentáásí waásisono. Maníkómpá'á
kentáásáfé'a súwa'nai e'a inái seró. 26 Maníkóní
akúmbá tiyáámba tíméro súne. 27 Fasi'aénkó
simásímakaintafe'a óraaka'a simátime'a súne.
Maankwándááífínkén-áái toráumai Maníkóní
akúmbá seyaafá'nánká simátíméro.

28 Fasi'aénkó Ísu Káráisiti aasiyaasí úwoi
wétuwa'nai-intafe'a inái súne.
Kemá Póro súnda-aai taí'áíye.

Aú-aaí símai kááísamakain-aaí
The New Testament in the Awiyaana language of
Papua New Guinea
Nupela Testamen long tokples Awiyaana

copyright © 1984 Wycliffe Bible Translators, Inc.

Language: Awiyaana

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-17

PDF generated using Haiola and XeLaTeX on 11 Nov 2022 from source files dated 9 Oct 2020

0dda5aa4-c019-59cf-b9ee-e1fd4762d49c